

**Zakon o izmjenama Zakona o Centralnoj banci Bosne i Hercegovine  
OBJAVLJEN:(«Službeni glasnik BiH», 76/06)**

**ZAKON O IZMJENAMA  
ZAKONA O CENTRALNOJ BANCII BOSNE I HERCEGOVINE**

**Član 1.**

U Zakonu o Centralnoj banci Bosne i Hercegovine (“Službeni glasnik BiH”, br. 1/97, 29/02, 8/03, 13/03, 14/03 i 9/05) članu 20. u stavu 1. riječ “tri” zamjenjuje se riječju “četiri”.

**Član 2.**

U članu 36, stav 1. mijenja se i glasi:

“1. Propisom Upravnog vijeća Centralne banke utvrđuje se minimalni iznos koji se obračunava na depozite i pozajmljena sredstava, bez obzira u kojoj valuti su sredstva izražena, koji su banke dužne da drže kod Centralne banke, preko centrale ili glavnih jedinica. Obavezne rezerve se primjenjuju jednako za sve banke.”.

**Član 3.**

U članu 64, stav 2. mijenja se i glasi:

“2. Centralna banka treba da u što kraćem vremenu, ali u svakom slučaju u roku od mjesec dana nakon završetka kvartala, pripremi i podnese Predsjedništvu Bosne i Hercegovine preliminarni (bez izvršene revizije) finansijski izvještaj za taj kvartal.”.

**Član 4.**

Ovaj zakon stupa na snagu narednog dana od dana objavljivanja u “Službenom glasniku BiH”, a objavit će se i u službenim glasilima entiteta i Brčko Distrikta Bosne i Hercegovine.

## **Obrazloženje**

### **I OSNOV ZA DONOŠENJE**

Osnov za izmjene Zakona o Centralnoj banci Bosne i Hercegovine sadržan je u odredbi člana 3. stava 1. tačke d), a u vezi sa članom IV stavom 4. tačkom a) Ustava Bosne i Hercegovine, prema kojem se monetarna politika definiše, usvaja i kontroliše putem Centralne banke Bosne i Hercegovine, a Parlamentarna skupština Bosne i Hercegovine je ovlaštena da donošenjem zakona provodi nadležnosti utvrđene Ustavom Bosne i Hercegovine.

### **II RAZLOZI ZA DONOŠENJE**

Imajući u vidu praktične razloge, predlažu se u biti izmjene Zakona o Centralnoj banci Bosne i Hercegovine koje su neznatne, ali za poslovanje Centralne banke Bosne i Hercegovine značajne. Izmjene se predlažu u članu 20. stavu 1, članu 36. stavu 1. i članu 64. stavu 2. Zakona, kako slijedi:

- U članu 20. stavu 1. predlaže se imenovanje glavnog internog revizora na period od četiri godine, umjesto tri godine. Naime, aktima Centralne banke Bosne i Hercegovine propisano je da se imenovana lica (viceguverneri i zamjenici glavnog internog revizora) imenuju na period od četiri godine, pa se predloženom izmjenom Zakona želi uskladiti period imenovanja i glavnog internog revizora.

- U članu 36. stavu 1. predlaže se brisanje propisanog nivoa obaveznih rezervi koji je utvrđen u iznosu do 20%. Naime, iz praktičnih razloga ograničenje minimalnog iznosa obaveznih rezervi ne treba utvrđivati Zakonom o Centralnoj banci Bosne i Hercegovine, nego ostaviti Upravnom vijeću Centralne banke Bosne i Hercegovine, kao nosiocu uređivanja monetarne politike, da utvrdi, svojim propisom, stopu obavezne rezerve, posebno u svjetlu permanentnog kreditnog rasta.

U članu 64. stavu 2. predlaže se izmjena roka za podnošenje kvartalnih finansijskih izvještaja Predsjedništvu Bosne i Hercegovine, budući da u propisanom roku nije moguće pribaviti svu potrebnu dokumentaciju i izvršiti odgovarajuća evidentiranja potrebna za izradu tih izvještaja, pa su u proteklom periodu kvartalni finansijski izvještaji podnošeni Predsjedništvu Bosne i Hercegovine u roku do mjesec dana nakon isteka predhodnog kvartala, kako se i predlaže ovom izmjenom.